

Акафист Пресвятой Богородице перед иконой «В скорбех и печалех Утешение»



Кондак 1

Взбранней Воеводе Владычице нашей Богородице, даровавшей нам пречудную икону Свою «В скорбех и печалех Утешение», благодарственное приносим пение. Ты же, Пренепорочная, прими молитвы наша и от всяких бед заступи рабы Твоя, с верою и любовию вопиющая Ти: Радуйся, Владычице, в скорбех и печалех нас присно утешающая.

Икос 1

Ангел множество и вся Небесная Воинства славят Тя непрестанно на небеси, Владычице, и мы, земнороднии, исполнению радости духовныя, притекающе к цельбоносней иконе Твоей, из глубины сердца приносим Ти глаголы сия:

Радуйся, Божие ко грешным благоволение.
Радуйся, кающихся пред Господом Богом крепкое заступление.
Радуйся, падшаго Адама воззвание.
Радуйся, слез Евиных избавление.
Радуйся, греховную отъемлющая скверну.
Радуйся, бане, омывающая совесть.
Радуйся, рождшая Избавителя, беззакония наша туне очищающего.
Радуйся, всечюдное всех к Богу примирение.
Радуйся, мосте, воистину преводяй нас от смерти к животу.
Радуйся, мир от потопа греховнаго спасающая.
Радуйся, лестнице небесная, Еюже Господь к нам сниде.
Радуйся, вина всех обожения.
Радуйся, Владычице, в скорбех и печалех нас присно утешающая.

Кондак 2

Видяще Тя на иконе Твоей святей, Богомати Пречистая, Богомладенца Христа на руках Твоих держащую и ликами святых окружаемую, умиляемся душами нашими и благоговейно с любовию покланяемся пречистаго лика Твоего изображению, зовуще Сыну Твоему Христу Богу: Аллилуиа.

Икос 2

Разум небесный открывая, Богородице Дево, благоволила еси многими чудесы прославить икону Твою, в земном жребии Твоем, Святей Горе Афонстей, да вси ведуще таковое Твое о ней благоволение, песненно Тебе зовут:

Радуйся, обуреваемых тихое пристанище.
Радуйся, сумнящихся известное утверждение.
Радуйся, едина Мати милосердия.
Радуйся, скорая Помощнице сущим в бедах и напастех.
Радуйся, скорбьми грехи наша очищающая.
Радуйся, печалию наша немощи душевныя врачующая.
Радуйся, суетныя радости мира сего презирати нас научающая.
Радуйся, от мира к премирным ум наш возводящая.
Радуйся, от любве земныя к небесней Божией любви нас привлекающая.
Радуйся, в самых страданиях наших утешение и благодатную жизнь нам подающая.
Радуйся, обетование благ вечных.
Радуйся, Ходатаице вечныя радости.
Радуйся, Владычице, в скорбех и печалех нас присно утешающая.

Кондак 3

Силу Божественныя благодати даруеши, о, Богомати, всем с верою и любовию прибегающим ко всечестному покрову Твоему; и нас, недугующих телом и душою, Благая Владычице, свыше укрепи и посещения Твоего сподоби, да спасаеми Тобою, непрестанно вопием Богу: Аллилуиа.

Икос 3

Имея любовь велию к людям, искупленным Кровию Сына Твоего и Бога, всем с верою и упованием прибегающим к Тебе милостивно подаеши руку помощи, Владычице, да вси единым сердцем и едиными усты приносят Ти пение сичевое:

Радуйся, милости сокровище многоценное.
Радуйся, отчаянных едина Надеждо.
Радуйся, тела моего врачевание.
Радуйся, души моя спасение.
Радуйся, твердая крепосте немощных.
Радуйся, изнемогающих Заступнице и укрепление.
Радуйся, гнев Божий Твоим молением скоро утоляющая.
Радуйся, страсти наша силою молитв Твоих укрошающая.
Радуйся, слепых зрение, глухих слышание.
Радуйся, хромым хождение, немых глаголение.
Радуйся, болящих благонадежное посещение.
Радуйся, яко Тобою по мере веры подаются благодатная исцеления всем немощствующим.
Радуйся, Владычице, в скорбех и печалех нас присно утешающая.

Кондак 4

Бурею многих бед одержимым нам помогаеши, Небесная Царице, с верою прибегающим к Тебе и поклоняющимся цельбоносному образу Твоему, егоже милостиво явила еси нам во утешение, да прославляя милость Твою, нам ниспосланную, рожденному от Тебе Спасителю мира зовем: Аллилуиа.

Икос 4

Слышавше братия скита Андреевскаго словеса отца своего духовнаго: «Да будет сия икона вам отрадою и утешением в скорбех и печалех», возрадовашеся зело о Твоем заступлении, Пресвятая Дево, и всю надежду на Тя возложивше, воспеша Ти тако:

Радуйся, радость миру Христа Спасителя рождающая.
Радуйся, мир от скорбей избавляющая.
Радуйся, хуления и клеветы на Сына Твоего терпевшая.
Радуйся, страданием Его спострадавшая.
Радуйся, скорбных матерей утешение.
Радуйся, чад их благодатное охранение.
Радуйся, в бедах скорое нам заступление.
Радуйся, заблудших исправление.
Радуйся, младенцев питание.
Радуйся, юных наставление.
Радуйся, Мати сиротствующих.
Радуйся, вдов заступление.
Радуйся, Владычице, в скорбех и печалех нас присно утешающая.

Кондак 5

Боготечная звезда явися икона Твоя, Дево Богородице, сиянием многих чудес духовно просвещая и неоскудно источая благодатная исцеления всем верным, усердно к ней притекающим и смиренно вопиющим Богу: Аллилуиа.

Икос 5

Видяще токи чудес, от святых иконы Твоя источаемыя, Всеблагая, вси людие земли Вятския стекахуся к ней на поклонение и на Тя все упование свое в скорбех и печалех возлагающе, воспеша Ти сиче:

Радуйся, Мати рода христианскаго.
Радуйся, усыновившая нас при Кресте Сына Твоего.
Радуйся, Бога с человеки соединившая.
Радуйся, верных Господеви сочетавшая.
Радуйся, Агнице, рождающая Агнца, взявшаго грехи мира.
Радуйся, чаше, черплющая нам радость от Источника безсмертия.
Радуйся, Споручнице спасения грешных.
Радуйся, Взыскание погибших.
Радуйся, нечаянная грешных Радосте.

Радуйся, падших востание.
Радуйся, Целительнице всех немощей.
Радуйся, утоление всякия печали.
Радуйся, Владычице, в скорбех и печалех нас присно утешающая.

Кондак 6

Проповедуют милости Твоя, Богородице, вси концы вселенныя, от святых иконы Твоея «В скорбех и печалех Утешение» бываемыя: болящим бо здравие, слепым прозрение, скорбящим утешение подаеши и всем на всяком месте и на всякий час благодатную помощь являеши, вопиющим о Тебе Всемилостивому Богу: Аллилуиа.

Икос 6

Возсияла еси многими лучами чудес икона Твоя, о, Богомати, и сими не токмо Гору Афонскую, но и множайшая места озарила еси, да научимся звати Тебе:

Радуйся, приносящая к Сыну Твоему и Богу моления верных.
Радуйся, и Сама у Престола Сына Твоего непрестанно молящаяся о нас.
Радуйся, Предстательнице к Богу, мир от бед спасающая.
Радуйся, Заступнице рода христианскаго, от Бога нам дарованная.
Радуйся, древо благосеннолиственное, имже покрываются мнози.
Радуйся, древо светлоплодовитое, имже питаются вернии.
Радуйся, покрове миру, ширший облака.
Радуйся, земле обетования, из неяже течет мед и млеко.
Радуйся, светлый облаче, верныя непрестанно освещающий.
Радуйся, столпе огненный, наставляяй избранныя к небесному наследию.
Радуйся, ниво, растящая обилие щедрот.
Радуйся, Подательнице всякия благодати.
Радуйся, Владычице, в скорбех и печалех нас присно утешающая.

Кондак 7

Хотящи явити токи чудес от иконы Своея «В скорбех и печалех Утешение», услышала еси, Владычице, молитву болящаго раба Твоего Владимира и от немоты исцеление ему даровала еси, да здрав сый душею и телом, проповедует всем милости Твоя, ради тоя иконы явленныя. Темже и мы прославляюще Бога, благодетельскаго чрез святыя образ Твой, вопием Ему: Аллилуиа.

Икос 7

Новое знамение милости Твоея явила еси, Царице Небесная, в чудесном прославлении святых иконы Твоея, к нейже с верою и любовью прибегающим и помощи от Тебе просящим всякий недуг и всякую язву душевную и телесную врачуеши. Сего ради вопием Ти:

Радуйся, купель, в нейже вся скорби наша погружаются.
Радуйся, чаше, Еюже радость и спасение восприемлем.
Радуйся, камению, напоивший жаждущия жизни.
Радуйся, древо, услаждающее сланыя воды житейскаго моря.
Радуйся, животворныя воды неистощимый источниче.
Радуйся, бане, омывающая греховную скверну.
Радуйся, скорбей наших услаждение.
Радуйся, печалей наших утоление.
Радуйся, болезней наших врачевание.
Радуйся, бед избавление.
Радуйся, демонов поправление.
Радуйся, врагов посрамление.
Радуйся, Владычице, в скорбех и печалех нас присно утешающая.

Кондак 8

Странствие земное многоскорбное и многмятежное услаждаеши нам матерним твоим о нас попечением, Богородице: Ты бо, яко благая Одигитрия, наставляеши нас к тихому и благооттишному пристанищу и молиши Сына Твоего о прощении прегрешений наших, да непрестанно вопием Ему: Аллилуиа.

Икос 8

Всем верным умиленно есть взирати на святую икону Твою, Всемилостивая Владычице, Ты бо еси всех скорбящих Утешительница и бедствующих Помощница. К Тебе убо прибегаем, Богомати, пред пречестною иконою Твоею припадающе: исполни радости и веселия скорбная сердца наша, да, получивше отраду и утешение, вопием Ти:

Радуйся, Путьводительнице, к Небесному отечеству нас руководящая.
Радуйся, Царице Неба и земли, врата райская нам отверзающая.

Радуйся, Милостивая, нас милующая.
Радуйся, Домостроительнице, житие наше добре устрояющая.
Радуйся, руно орошенное, еже Гедеон предвиде.
Радуйся, блаженное чрево, невместимаго всеми Бога вместившее.
Радуйся, Неопалимая Купино.
Радуйся, Нерушимая Стено.
Радуйся, Живоносный Источниче.
Радуйся, Цвете Неувядаемый.
Радуйся, умягчение сердец злых.
Радуйся, умиление благих.
Радуйся, Владычице, в скорбех и печалех нас присно утешающая.

Кондак 9

Всякия утоляеши болезни и скорби, во обстоянии сущим руку помощи простирающи, о, Всеблагая: призрела бо еси на раба Твоего Тимофея и исцеление ему даровала еси. Услади убо и наша скорби и печали, скорая Помощнице, и исцеление подаждь недугующим душам и телесем нашим, да вопием немолчно: Аллилуиа.

Икос 9

Ветии многовещаннии недоумевают, киими словесы достойно восхвалити вся чудеса Твоя, Богородице, от святых иконы Твоея бываемыя. Мы же, Твоя неисчетная благоденствия видяще, присно Тя ублажаем и хвалебно Тебе вопием:

Радуйся, обрадовавшая надеянием на Тя всех христиан.
Радуйся, Радосте и умирение миру.
Радуйся, Подательнице Божественных благости.
Радуйся, Надеждо благ вечных.
Радуйся, кораблю хотящих спастися.
Радуйся, пристанище житейских плаваний.
Радуйся, верная Хранительнице уповающих на Тя по Бозе.
Радуйся, одеждо нагих дерзновения.
Радуйся, Заступнице всех и утверждение.
Радуйся, всех верных ограждение и священное прибежище.
Радуйся, помощи верно молящихся Тебе.
Радуйся, светлое благодати познание.
Радуйся, Владычице, в скорбех и печалех нас присно утешающая.

Кондак 10

Спасительное прибежище в скорбех и бедах являеши всему роду человеческому, Мати Божия: Тя бо дарова Человеколюбец Господь погибающим в помощь, покров и утешение. Мы же, вечныя муки Твоим ходатайством избавитися уповающе, верно вопием Сыну Твоему и Богу нашему: Аллилуиа.

Икос 10

Стена необоримая и источник чудес явися святая икона Твоя, Владычице, всем к Твоему покрову прибегающим. Темже и мы, припадающе пред образом Твоим, молим Тя: защити и сохрани нас невредимы от всех напастей и нестроений, с любовию взывающих Ти из глубины души:

Радуйся, столпе девства.
Радуйся, чистоты и целомудрия сосуде избранный.
Радуйся, воинствующим на плоть целомудрием изрядное венчание.
Радуйся, во иночестве благоскорбящим Подательнице вечнаго радования.
Радуйся, пламень страстей изменяющая.
Радуйся, мрак искушений прогоняющая.
Радуйся, Наставнице целомудрия.
Радуйся, чистоты ограждение.
Радуйся, исправление человеков.
Радуйся, Еюже от падения нашего востяхом.
Радуйся, твердое веры утверждение.
Радуйся, приятное молитвы кадило.
Радуйся, Владычице, в скорбех и печалех нас присно утешающая.

Кондак 11

Пение сие наше не презри, Пресвятая Дево, егоже всеумиленно приносим Ти, раби Твои, яко всесильней Заступнице рода нашего, но помози нам, Всеблагая, покаянием очиститися от скверны греховныя и преуспети в чистом и богоугодном житии, да воспоминаия неисчетная чудотворения Твоя, вопием Подателю всех благ Богу: Аллилуиа.

Икос 11

Светлыми лучами чудес пречестная икона Твоя, Владычице, немерцаемо сияет и весь мир благодатно озаряет, мрак греховный и уныние разгоняя. Не лиши, о, Всеблагая, Твоего заступления и нас, в житейском море треволнениями обуреваемых, обаче от сердца приносящих Ти благохваления сия:

Радуйся, сильным Твоим заступлением от всех бед нас избавляющая.

Радуйся, от труса и потопа нас защищающая.

Радуйся, от глада душевного и телесного нас снабдевающая.

Радуйся, огонь росой молитв Твоих угашающая.

Радуйся, от смертного губительства нас спасающая.

Радуйся, в бранех крепкая Помощнице.

Радуйся, от нашествия иноплемнных нас ограждающая.

Радуйся, от междоусобных брани охраняющая.

Радуйся, плавающих легкое по водам прехожждение.

Радуйся, путешествующих добрая Водительнице.

Радуйся, пленных освобождение.

Радуйся, от належащего праведного прещения Божия скорое избавление.

Радуйся, Владычице, в скорбех и печалех нас присно утешающая.

Кондак 12

Благодать Божественную и милость испроси нам, Всемилостивая Владычице, у Сына Твоего и Бога, да, тою укрепляеми и направляеми, по пути сем многоскорбнем неуклонно шествовати возможем. Ты же, о, Богомати, от всякаго зла сохрани нас, под осенение иконы Твоея святыя прибегающих и со умилением о Тебе вопиющих: Аллилуиа.

Икос 12

Поюще Твоя милости и чудеса, Богородительнице, бывшая в древняя и настоящая времена, хвалим, славим и величаем Тя, честнейшую воистину Херувим и славнейшую без сравнения Серафим, и, припадая к пречестному образу Твоему, умильно сей лобызаем, с трепетом и любовию воспевая Ти сице:

Радуйся, непостыдное наше упование в животе и по преставлении нашем.

Радуйся, уповающим на Тя мирен конец жития сего подающая.

Радуйся, в день судный наша Надеждо и Защищение.

Радуйся, Судии Праведного умоление.

Радуйся, геенны вечныя избавление.

Радуйся, Надеждо вечнаго спасения.

Радуйся, ключу Царствия Христова.

Радуйся, двери райская.

Радуйся, мосте, к небесем преводяй.

Радуйся, всех кающихся грешников прибежище и благая Заступнице.

Радуйся, Ангелов радости.

Радуйся, всех праведных славо и утешение.

Радуйся, Владычице, в скорбех и печалех нас присно утешающая.

Кондак 13

О, Всепетая Мати Сладчайшаго Господа нашего Иисуса Христа! Услыши глас скорбящих раб Твоих и приими сие малое моление наше, от любящих сердец Тебе приносимое: избави нас от всяких бед, скорбей и напастей, недуги наша исцели, всяку злобу и вражду отжени от нас и причастниками жизни вечныя содейай о Тебе благодарно зовущих: Аллилуиа.

(Этот кондак читается трижды, затем икос 1 и кондак 1)

Молитва

К кому возопию, Владычице? К кому прибегну в горести моей, аще не к Тебе, Царице Небесная? Кто плач мой и воздыхание мое примет, аще не Ты, Пренепорочная, Надеждо христиан и Прибежище нам, грешным? Кто паче Тебе в напастех защитит? Услыши убо стенание мое и приклони ухо Твое ко мне, Владычице Мати Бога моего, и не презри мене, требующаго Твоея помощи, и не отрини мене, грешнаго. Вразуми и научи мя, Царице Небесная; не отступи от мене, раба Твоего, Владычице, за роптание мое, но буди мне Мати и Заступница. Вручаю себе милостивому покрову Твоему: приведи мя, грешнаго, к тихой и безмятежной жизни, да плачуся о гресех моих. К кому бо прибегну повинный аз, аще не к Тебе, упованию и прибежищу грешных, надеждою на неизреченную милость Твою и щедроты Твоя окривляемъ? О, Владычице, Царице Небесная! Ты мне упование и прибежище, покров и заступление и помощь. Царице моя Преблагая и скорая Заступнице, покрый Твоим ходатайством моя прегрешения, защити мене от враг видимых и невидимых; умягчи сердца злых человек, возстающих на мя. О, Мати Господа моего Творца! Ты еси корень девства и неувядаемый цвет чистоты. О, Богородительнице! Ты подаждь ми помощь немощствующему плотскими страстьми и болезнующему сердцем, едино бо Твое и с Тобою Твоего Сына и Бога нашего имам заступление; и Твоим пречудным заступлением да избавлюся от всякия беды и напасти, о, Пренепорочная и Преславная Божия Мати Марие. Темже со упованием глаголю и вопию: радуйся, Благодатная, радуйся, Обрадованная, радуйся, Преблагословенная, Господь с Тобою! Аминь.

